

Monsieur

encore que ie ne sache ou cete lettre vous rencontrera, et que vous la recevrez peutestre en vous preparant a faire voyage ou pendant quelque autre occupation qui la pourra rendre importune, toutefois le desir que j'ay de ne perdre aucune occasion de me conserver en vostre souvenir fait que ie n'en refuse aucune de vous escrire, non pas mesme de celles qui ne peuvent que vous estre a charge et vous faire connoistre mon effronterie, Comme a cete fois j'ay este prie par un homme docte de mon ancienne connoissance, nomme M<sup>r</sup> Hardy conseiller a Paris, de m'enquerir s'il seroit possible de faire en sorte que M<sup>r</sup> de l'Academie de Leyde luy prestassent deux livres Arabes intitulez l'un Heronis Parvulcon et l'autre Ptolemai coelum, qui sont du nombre de ceux que M<sup>r</sup> Golius a apporter du Levant, et il offre de donner caution a Amsterdam de telle somme d'argent qu'on jugera a propos pour la seurete du renvoy de ces livres, Il voudroit bien aussy les sept d'Apollonius qui sont en Arabe mais il desire principalement les deux autres, et il semble que la crainte d'estre refuse l'empesche de demander le tout ensemble. Mais il allegue l'exemple de M<sup>r</sup> Scionita Professeur du Roy en langue Arabe auquel on a enuoye d'icy une Cosmographie Syriaque, Et il se persuade qu'un mot de vostre part a M<sup>r</sup> Heinsius, qui est le Dispensator en cete affaire, pourra tout ce qu'il vous plaira. Pour moy a cause que le pere Mercenne me mande qu'il vous en a desia escrit j'ay creu ne devoir pas faire beaucoup de scrupule



de joindre mes prieres aux siennes, afin que si c'est chose  
qui se puisse, ie sois du nombre de ceux qui vous en auront  
obligation, et s'il s'y rencontre de la difficulte que vous ayer  
en moy sur qui vous dechargar de l'ennie du refus plus librement  
que sur aucun autre, car ie la supporteray tresvolontiers, et la  
moindre de vos inclinations, m'est beaucoup plus chere que tous  
les livres Arabes qui sont au monde. Au reste le nom de Mr.  
Heinsius me fait souvenir d'une lettre que j'ay receue il y  
a quelque temps de Mr. de Balzac. ou sont ces mots. Vous  
estes obligé de vous faire justice la dessus: ou pour le moins  
de vous venir dire en personne les raisons que vous avez de vous  
affliger de cete cruelle absence. Si elles sont plus fortes que celles  
que ie leur opposeray, ie vous promett d'y acquiescer, et d'aller  
respirer avec vous de la fumée, et boire des medecines. Par-  
donnez moy si j'appelle ainsi l'air et la biere de vostre Treyden,  
et donnez vous bien garde de le dire a Monsieur Heinsius.  
C'est le plus redoutable docteur qui soit aujourdhuy dans le  
monde, et qui entend le moins raillerie, quand on traite avec  
luy. Il a pris a contresens tout ce que ie luy avois escrit de  
plus honnestte et de plus respectueux, et pensant luy faire des  
civilitez il les a receus comme des outrages. Dieu me garde  
d'une si tyrannique societe. Mais il faudroit s'entretenir  
teste a teste sur ce sujet, et sur beaucoup d'autres, et veray  
audire ac reddere voces et c.

Par ou vous pouvez voir que l'intention de M.<sup>r</sup> de Balzac n'a  
 nullement esté de rien escrire qui pust déplaire a M.<sup>r</sup> Heinsius,  
 Mais ie laisse a vostre discretion de ne luy en faire scauoir  
 qu'autant qu'il est besoin pour l'assurer de cete verité, car  
 peut estre que ces mots de redoutable docteur ou Tyrannique  
 société luy pourroient deuechef sembler trop rudes, et ie serois  
 tres marry d'auoir aydé en quelque facon que ce soit a semer  
 la peme de discorde. ie suis

Monsieur

Vostre tres humble et  
 tres obeissant seruiteur  
 DESMAREZ

*[Faint, illegible handwritten text, likely bleed-through from the reverse side of the page.]*

*[Faint handwritten notes or signatures at the bottom left corner.]*